

四庫全書薈要

• 乾隆御覽本

集部

詞綜卷二十四

翰林院檢討朱彝尊編

宋詞七十首

寇寺丞 一首

陳參政 一首

杜郎中 一首

德祐太學生 二首

無名氏 四十五首

裴湘 一首

僧揮 三首

祖可 三首

惠洪 一首

上清蔡真人 一首

丁真人 二首

葛長庚 八首

乩仙 一首

寇寺丞

點絳脣

春睡曹騰覺時鴛被堆香煖起來猶懶觸目情何限  
深院日斜人靜花陰轉柔腸斷凭高不見芳草連天遠

陳參政

木蘭花慢

送陳石泉  
自北歸

北歸人未老喜依舊著南冠正雪暗滹沱雲迷茫夢  
落邯鄲鄉心促日行萬里幸此身生入玉門關多少秦  
烟隴霧西湖淨洗征衫 燕山望不見吳山回首一征  
鞍慨秋原衰草高岡落木那忍重看鈞天紫微何處問  
瑤池八駿幾時還誰在天津橋上杜鵑聲裏闌干

杜郎中

玉樓春

風解地水蟬翅薄庭樹枯枝翻翠萼背寒就暖起偏慵

半捲珠簾憑畫閣  
晴景融融烟漠漠  
天際行人垂信  
約病身先是怕春來  
長到恁時添瘦削

德祐太學生

百字令

德祐  
乙亥

半堤花雨對芳辰  
消遣無奈情緒  
春色尚堪描畫  
在萬紫千紅塵土  
鵲促歸期  
鶯收巧舌  
燕作留人語  
遶欄紅藥韶華留此孤主  
真個恨殺東風  
幾番過了  
不似今番苦樂事  
賞心磨滅盡  
忽見飛書傳羽  
湖水湖烟峰南

峰北總是堪傷處新塘楊柳小腰猶自歌舞

見湖海新  
聞三四謂

衆宮女行五謂朝士去六謂臺官默七指太學上書八  
九謂只陳宜中在東風謂賈似道飛書傳羽北軍至也

新塘楊柳

謂賈妾

祝英臺近

德祐  
乙亥

倚危欄斜日暮  
驀驀甚情緒  
穉柳嬌黃金未禁風雨  
春江萬里雲濤扁舟飛渡  
那更聽塞鴻無數  
歎離阻有

恨流落天涯誰念泣孤旅  
滿目風塵冉冉如飛霧  
是何

人惹愁來那人何處  
怎知道愁來不去

穉柳謂幼君嬌  
黃謂太后扁舟

飛渡謂北軍至塞鴻指流民也人  
惹愁來謂賈出那人何處謂賈去。

無名氏

魚遊春水

春景

秦樓東風裏燕子還來尋舊壘餘寒猶峭紅日薄侵羅  
綺嫩草方抽碧玉茵媚柳輕窄黃金縷鶯囀上林魚遊  
春水 幾曲闌干遍倚又是一番新桃李佳人應怪歸  
遲梅妝淚洗鳳簫聲絕沉孤鴈望斷清波無雙鯉雲山  
萬重寸心千里

眉峯碧

蹙破眉峯碧。纖手還重執。鎮日相看未足時。忍便使鴛鴦隻。  
薄暮投村驛。風雨愁通夕。窓外芭蕉窓裏人。分  
葉上心頭滴。

玉照新志裕陵親書其後  
此詞甚佳不知何人所作

撲蝴蝶

烟條雨葉綠遍江南岸。思歸倦客。尋芳來較晚。岫邊紅  
日初斜陌上花飛正滿。淒涼數聲羌管。怨春短。玉人  
應。在明月樓中。畫眉嬾。蠻箋錦字多時。魚鴈斷。恨隨去



水東流事與行雲共遠羅衾舊香猶暖

胡元任云非惟藻麗可喜其腔

調亦自  
婉美

踏莎行

碧蘚迴廊綠楊深院花期夜入簾猶捲照人無奈月華  
明潛身却恨花陰淺密約難憑幽歡未展看看滴盡  
銅壺箭闌干敲遍不應人分明燭下聞刀剪

玉瓏璫

城南路橋南樹玉鈎簾卷香橫霧新相識舊相識淺顰

低笑嫩紅輕碧惜惜惜

劉郎去阮郎住為雲為雨朝

還暮心相憶空相憶露荷心性柳花踪跡得得得

能改齋漫

錄近有士人嘗於錢塘江漲橋為狹斜之游作此詞其後朝廷復收河南士人陷而不返其友作詩寄之且附以龍涎香詩云江漲橋邊花發時故人曾共著征衣請君莫唱橋南曲花已飄零人不歸士人在河南得詩酬之云認得吳家心字香玉窓春夢紫羅囊餘薰未歇人何許洗破征衣更斷腸

九張機

見樂府雅詞

一張機采桑陌上試春衣風晴日暖慵無力桃花枝上

啼鶯言語不肯放人歸

又

四張機鴛鴦織就欲雙飛  
可憐未老頭先白  
春波碧草  
曉寒深處相對浴紅衣

又

五張機橫紋織就沈郎詩  
中心一句無人會  
不言愁恨  
不言憔悴只恁寄相思

又

七張機春蠶吐盡一生絲  
莫教容易裁羅綺  
無端剪破

仙鸞彩鳳分作兩邊衣

又

九張機雙花雙葉又雙枝  
薄情自古多離別從頭到底  
將心縈繫穿過一條絲

又

輕絲象牀玉手出新奇  
千花萬草光凝碧裁縫衣著春  
天歌舞飛蝶語黃鸝

又

春衣素絲染就已堪悲塵昏汗污無顏色應同秋扇從  
茲永棄無復奉君時

玉樓春

題鉛山驛壁  
見能改齋謾錄

東風楊柳門前路畢竟雕鞍留不住柔情勝似嶺頭雲  
別淚多於花上雨青樓畫幕無重數聽得樓邊車馬  
去若將眉黛染情深直到丹青難畫處

踏青游

贈妓崔  
念四

識箇人人恰止二年歡會似賭賽六隻渾四向巫山重

重去如魚水兩情美同倚畫樓十二倚了又還重倚

兩日不來時時在人心裏擬問卜常占歸計擽三八清  
齋望永同鴛被到夢裏驀然被人驚覺夢也有頭無尾

吳虎臣云政和間  
士人作都下盛傳

調笑

桃源集句 見  
宣和九重樂府

相誤桃源路萬里蒼蒼烟水暮留君不住君須去秋月  
春風閒度桃花零亂如紅雨人面不知何處

祝英臺近

憶別 見  
樂府雅詞

海棠開花影下憶得舊遊戲恰似驂鸞同在彩雲裏夢  
回雨散雲收匆匆歸去一枕乍驚殘春睡甚情味人  
去花也飄零餘香半憔悴點點飛紅都是去時淚可堪  
冷落黃昏瀟瀟微雨斷魂處朱欄獨倚

又

剪酴醾移芍藥深院教鸚鵡消遣宿醒欹枕熏沈炷自  
從載酒西湖探梅南浦久不見雪兒歌舞恨無據因  
甚不展眉頭凝愁過百五雙燕無情難寄斷腸句可憐

淚濕青綃怨題紅葉落花亂一簾風雨

水調歌頭

建炎庚戌題吳江  
見中吳記聞

平生太湖上短棹幾經過如今重到何事愁與水雲多  
擬把匣中長劍換取扁舟一葉歸去老漁蓑銀艾非吾  
事丘壑已蹉跎 鱸新鱸斟美酒起悲歌太平生長豈  
謂今日識干戈欲瀉三江雪浪淨洗烽烟千里不為挽  
天河回首望霄漢雙淚墮清波

楊柳枝

見樂府  
雅詞



簌簌花飛一雨殘  
乍衣單屏風數幅畫江山  
水雲間別易會難無計  
那淚潸潸夕陽樓上凭闌干  
望長安

浣溪沙

瓜陂鋪題壁  
見能改齋謾錄

剪碎香羅裛淚痕  
鷓鴣聲斷不堪聞  
馬嘶人去近黃昏  
整整斜斜楊柳陌  
疎疎密密杏花村  
一番風月更消

魂

黃季岑云瓜洲瓜陂鋪有  
用篋刀刻青泥壁為詞

鷓鴣天

上元見  
蘆浦筆記

宣德樓前雪未融  
賀正人見彩山紅  
九衢照影紛紛月

萬井吹香細細風 複道遠暗相通平陽主第五王宮

鳳簫聲裏春寒淺不到珠簾第二重

劉興伯云上元詞十五首備述宣政

之盛非想像者所能道

當與夢華錄並行也

綠意

荷花見樂府雅詞

碧圓自潔向淺洲遠浦亭亭清絕猶有遺簪不展秋心

能卷幾多炎熱鴛鴦密語同傾蓋且莫與浣紗人說怨

歌忽斷花回碎却翠雲千疊回首當年漢舞怕飛去

謾縐留仙裙褶戀戀青衫猶染枯香還笑鬢絲飄雪盤

心清露如鉛水又一夜西風聽折喜淨看匹練秋光倒  
瀉半湖明月

擷芳詞

見古今詞話

風搖動雨濛茸翠條柔弱花頭重春衫窄香肌濕記得  
年時共伊曾摘都如夢何曾共可憐孤似釵頭鳳關  
山隔晚雲碧燕兒來也又無消息

御街行

見古今詞話

霜風漸緊寒侵袂聽孤鴈聲嘹唳一聲聲送一聲悲雲

淡碧天如水披衣告語鴈兒略住聽我些兒事  
塔兒南畔城兒裏第三箇橋兒外瀕河西岸小紅樓門外梧  
桐雕砌請教且與低聲飛過那裏有人人無寐

應天長

見古今詞話

雕鞍成謾駐望斷也不歸院深天暮倚遍舊日曾共凭  
肩門戶踏青何處所想醉拍春衫歌舞征旆舉一步紅  
塵一步回顧行行愁獨語想媚容今宵怨郎不住來  
為相思却又空將愁去人生無定據歎後會不知何處

愁萬縷憑仗東風和淚吹與

念奴嬌

和東坡韻

炎精中否歎人材委靡都無英物鐵馬長驅頻奪魄誰  
作長城堅壁萬里奔騰兩宮幽繫此事從何說草廬三  
顧豈無高臥英傑天意建我中興吾君神武卜一作踵

曾孫周發海岳封疆俱效職

一作順

堠火會看漸熄搔首

欵噓問天無語徒有衝冠髮孤忠耿耿劒鏑冷浸秋月

又

題項羽廟

英雄間作楚將軍  
鞭虎驅龍而起空  
費咸陽三月火鑄  
就金刀神器  
垓下兵稀陰陵道狹  
月暗雲如壘楚歌喧  
唱山川都姓劉矣  
悲泣喚醒虞姬為伊  
死別血刃飛花碎  
霸業銷沈  
騅不逝氣盡烏江  
江水古廟頽垣斜陽  
紅樹遺恨鴉聲裏  
興亡休問高陵秋  
草空翠

點絳脣

秋社

燕子依依曉來總為誰  
歸去淡雲生處已覺賓鴻度  
淺笑低顰便面機中素  
乘鸞女瑱窓瓊宇會有明年暑

烏夜啼

見天機  
餘錦

都無一點殘紅夜來風底事東君歸去太匆匆  
桃花  
醉梨花淚總成空斷送一年春在綠陰中

又

見古今  
詞話

一彎月挂危樓似藏鈎醉裏不知黃葉報新秋  
征鴻  
斷歸雲亂遠峯愁愁見綠楊凝恨在江頭

秦樓月

題蓬  
萊閣

烟漠漠海天搖蕩蓬萊閣蓬萊閣朱甍碧瓦半侵寥廓

三山謾有長生藥  
茫茫雲海風濤惡  
風濤惡仙槎不  
見暮沙潮落

又

秋寂寂碧紗窓  
外人橫笛人橫笛  
天津橋上舊曾聽得  
宮妝玉指無人識  
龍吟水底聲初息  
聲初息月明江  
岸數峯凝碧

西江月

見翰墨

記得洛陽話別十年社燕秋鴻  
今朝相遇暮雲東對坐



旗亭說夢 破帽手遮斜日練衣袖卷寒風蘆花江上  
兩衰翁消得幾番相送

尉遲杯

見梅苑

歲云暮歎光陰冉冉能幾許江梅尚怯餘寒長安信音  
猶阻東風無據凭欄久欲去還凝竚憶溪邊月底徘徊  
暗香疎影庭戶 朝來凍解霜消南枝上香英數點微  
露把酒看花無言有淚還是那時情緒花依舊晨妝何  
處謾贏得花前愁千縷儘高樓畫角頻吹任教紛紛飛

素

洞仙歌

見梅苑

斷雲疎雨冷落空山道匹馬駸駸又重到望孤村三兩  
茅屋疎籬溪水畔一簇蘆花晚照尋思行樂地事去  
無痕回首湘波與天杳歎人生幾度能醉金釵青鏡裏  
贏得朱顏未老又一點枝頭破黃昏問客路春風為誰  
開早

萬年歡

見梅苑

天氣嚴凝乍寒梅數枝嶺上開  
坼傳粉凝脂疑是素娥  
妝拭先報陽和信息更雪月交光一色  
因追念往日歡  
遊共君攜手同摘  
別來又經歲隔奈高樓夢斷無計  
尋覓冷艷寒容啼雨恨烟愁濕似向人前  
淚滴怎不使  
伊家思憶還只恐寂寞空枝又隨昨夜羌笛

鞞紅

見梅苑

粉香尤嫩霜寒可慣  
怎奈向春心已轉玉容別是一般  
閒婉悄不管桃紅杏淺  
月影簾櫳金隄波面漸細細

香風滿院一枝折寄故人雖遠莫輒使江南信斷

憶少年

見梅苑

疎疎整整斜斜淡淡盈盈脈脈徒憐暗香句笑梨花顏色  
羈馬蕭蕭行又急空回首水寒沙白天涯倦牢落  
忽一聲羌笛

琴調相思引

膽樣瓶兒幾點春剪來猶帶水雲痕且移孤冷相伴最  
深樽每為惜花無曉夜教人甚處不銷魂為君惆悵

何獨是黃昏

眼兒媚

蕭蕭江上荻花秋。做弄許多愁。半竿落日，兩行新鴈，一葉扁舟。  
惜分長怕君先去，直待醉時休。今宵眼底，明朝心上，後日眉頭。

步蟾宮

東風捏就腰肢細。繫六幅裙兒不起。看來只慣掌中行。  
怎教在燭花影裏。更闌應是鉛華退暗。感損眉峯雙

翠夜深著。綉小鞋兒斜靠著。屏風立地。

搗練子

見天機  
餘錦

林下路水邊亭。涼吹水曲散餘醒。小藤牀隨意橫。猶  
記得舊時經。翠荷開雨。做秋聲。恁時節不堪聽。

謁金門

見天機  
餘錦

山無數。遮斷故人何處。見說蘭舟獨繫住。溪邊紅葉樹。  
憶著前時歡遇。惹起今番愁緒。怎得西風吹淚去。陽  
臺為暮雨。

風光好

見天機  
餘錦

柳陰陰水沈沈風約雙鳬立不禁碧波心

孤村橋斷

人迷路舟橫渡旋買村醪淺淺斟更微吟

天香

龍涎香

瀛嶠浮烟滄波挂月潛虬睡起清曉萬里楂程一番花  
信付與露薇冰腦纖雲漸暖凝翠席氤氲不了銀葉重  
調火活珠簾日垂風悄螺屏酒醒夢好繡羅幃依舊  
痕少幾度試拈心字暗驚芳抱隱約仙州路杳謾珮影

玲瓏護嬌小素手金篝春情未老

裴

湘

字楚老仁宗時  
內官有肯堂集

浪淘沙

并門

鴈塞說并門郡枕西汾山形高下遠相吞古寺樓臺依  
碧嶂烟景遙分晉廟鎖溪雲簫鼓仍存牛羊斜日自  
歸村惟有故城禾黍地前事消魂

僧

揮

字仲殊安州進士姓張氏棄家為  
僧居杭州吳山寶月寺有詞七卷

黃叔暘云仲殊之詞多矣  
佳者固不少而小令為最



南柯子

十里青山遠，潮平路帶沙。  
數聲啼鳥怨年華。又是淒涼時候，在天涯。  
白露收殘月，清風散曉霞。  
綠楊堤畔闌荷花。記得年時沽酒，那人家。

玉樓春

芭蕉

飛香漠漠簾帷暖，一線水沈烟未斷。  
紅樓西畔小闌干，盡日倚欄人已遠。  
黃梅雨過芭蕉晚，鳳尾翠搖雙葉短。  
舊年顏色舊年心，留到如今春不管。

柳梢青

岸草平沙吳王故苑柳裊烟斜雨後寒輕風前香軟春  
在梨花 行人一棹天涯酒醒處殘陽亂鴉門外秋千  
牆頭紅粉深院誰家

僧祖可

字正平丹陽人蘇伯固之子住廬山與陳師道徐俯謝逸預西江詩社有東溪集

吳虎臣云正平工詩其長短句尤佳世徒稱其詩也

小沖山

誰向江頭遣恨濃碧波流不斷楚山重柳烟和雨隔疎

鐘黃昏後羅幕更朦朧  
桃李小園空阿誰猶笑拾  
殘紅珠簾卷盡夜來風  
人不見春在綠蕪中

菩薩蠻

西風簌簌低紅葉梧桐影裏銀河匝  
夢破畫簾垂月明  
烏鵲飛新愁知幾  
一作許欲似絲千縷鴈已不堪聞

砧聲何處村

又

誰能畫取沙邊雨和烟澹掃蒹葭渚  
別岸却斜暉采蓮

人未歸 鴛鴦如解語對浴紅衣去去了更回頭教儂  
特地愁

釋惠洪

字覺範有石門文字禪

許彥周云上人善作小詞情思婉約似秦少游仲殊參寥皆不能及

青玉案

和賀方回韻

綠槐烟柳長亭路恨取次分離去日永如年愁難度高  
城回首暮雲遮盡目斷知何處 解鞍旅舍天將暮暗  
憶丁寧千萬句一寸柔腸情幾許薄衾孤枕夢回人靜

徹曉瀟瀟雨

上清蔡真人

法駕導引

闌干曲闌干曲紅颺繡簾旌花嫩不禁纖手捻被風吹

去意還驚眉恨蹙山青

夷堅志云陳東靖康間嘗飲于京師酒樓有妓倚欄歌此詞音

調清越東不覺傾聽其後有鏗鐵板閑引步虛聲塵世無人知此曲却騎黃鶴上瑤京風冷月華清五句問何人所製曰上清蔡真人詞也

于真人

調見彭致中鳴鶴餘音按北宋有虛靖真君詞內有和于真人作

鳳棲梧

綠暗紅稀春已暮  
燕子銜泥飛入垂楊處  
柳絮欲停風不住  
杜鵑聲裏山無數  
竹杖芒鞋無定據  
穿過溪南獨木橫橋路  
樵子漁師來又去  
一川風月誰為主

行香子

閨苑瀛洲金谷重樓總不如  
茅舍清幽野花鋪地算也  
風流却也宜春也宜夏也宜秋  
酒熟堪留客至須留  
更無榮無辱無憂退閒一步著  
甚來由但倦時眠渴時

飲醉時謳

葛長庚

自號白玉蟾閩人一云瓊州人居武夷嘉定中詔徵赴闕館太乙宮封紫清明道真人有

海瓊集

詞二卷

醉江月

武昌懷古

漢江北瀉下長淮洗盡胸中今古樓櫓橫波征鴈遠誰  
見魚龍夜舞鸚鵡洲雲鳳凰池月付與沙頭鷺功名何  
處年年惟見春絮非不豪似周瑜壯如黃祖亦逐秋  
風度野草閒花無限數渺在西山南浦黃鶴樓人赤烏

年事江漢亭前路浮萍無據水天幾度朝暮

水龍吟

採藥  
徑

雲屏謾鎖空山寒猿啼斷松枝翠芝英安在木苗已老  
徒勞屐齒應記洞中鳳簫錦瑟鎮常歌吹悵蒼苔路杳  
石門信斷無人問溪頭事回首暝烟無際但紛紛落  
花如淚多情易老青鸞何處書成難寄欲問雙蛾翠蟬  
金鳳向誰嬌媚想分香舊恨劉郎去後一溪流水

水調歌頭



江上春山遠山下暮雲長相留相送時見雙燕語風檣  
滿目飛花萬點回首故人千里把酒沃愁腸回鴈峯前  
路烟樹正蒼蒼漏聲殘燈焰短馬蹄香浮雲飛絮一  
身將影向瀟湘多少風前月下迤邐天涯海角魂夢亦  
淒涼又是春將暮無語對斜陽

摸魚兒

問滄江舊盟鷗鷺年來景物誰主悠悠客鬢知何事吹  
滿西風塵土渾未悟謾自許功名談笑侯千戶春衫戲

舞怕三徑都荒一犁未把猿鶴笑君誤 君且住未必  
心期盡負江山秋事如許月明風靜萍花路欹枕試聽  
鳴櫓還又去道喚取陶泓要草歸來賦相思最苦是野  
水連天漁榔四起蓑笠占烟雨

霜天曉角

綠淨堂

五羊安在城市何曾改十萬人家闌闌東亦海西亦海  
歲歲蒲澗會地接蓬萊界老樹知他一劒千山外萬  
山外

賀新郎

且盡杯中酒問平生湖海心期更如君否渭樹江雲多  
少恨離合古今非偶更風雨十常八九長鉞歌彈明月  
墮對蕭蕭客鬢閒攜手還怕折渡頭柳小樓夜久微  
涼透倚危欄一池倒影半空星斗此會明年知何處蘋  
末秋風未久謾輸與鷺朋鷗友已辦扁舟松江去與鱸  
魚葦菜論交舊應念此重回首

又

挽住風前柳。問鷗夷、當日扁舟。近曾來否。月落潮生，無限事零落茶烟未久。謾留得、蓴鱸依舊。可是從來功名誤。撫焦桐、誰繼風流。後今古、恨一搔首。江涵鴈影，梅花瘦、四無人。雪飛風起，夜窓如晝。萬里乾坤清絕處，只許漁翁釣叟。近又落詩人豪友。猛拍欄干呼鷗鷺。道他年我亦垂綸手。飛過我、共樽酒。

又

肇慶府送談  
金華張月窓

謂是無情者。又如何、臨岐欲別。淚珠如灑。此去蘭舟雙

將急兩岸秋山似畫  
況已是芙蓉開也  
小立西風楊柳  
岸覺衣單略說些些話  
重把我袖兒把  
小詞做了和  
愁寫送將歸要相思處  
月明今夜客裏不堪仍送客  
昔交游亦寡  
況慘慘蒼梧之野  
未可淒涼休哽咽  
更明朝後日纔方卸情  
默默斜陽下

乚仙


憶少年

淒涼天氣淒涼院落  
淒涼時候孤鴻叫斜月  
伴寒燈殘

漏落盡梧桐秋影瘦菱鑑古畫眉難就重陽又近也  
對黃花依舊



詞綜卷二十四



總校官庶吉士臣張能照  
校對官中書臣潘庭筠  
謄錄監生臣王永年



欽定四庫全書薈要

集部

詞綜卷二十

五六

詳校官編修臣繆晉



詞綜卷二十五

翰林院檢討朱彝尊編

宋詞五十首

盧氏一首

舒氏一首

魏夫人三首

延安夫人一首

李清照十一首

阮逸女一首

幼卿一首

吳淑姬二首

朱淑真五首

蔣興祖女一首



鄭意娘一首

慕容品卿妻一首

孫道絢三首

鄭文妻二首

陸游妾一首

美奴二首

王清惠一首

徐君寶妻一首

金德淑一首

琴操一首

盼盼一首

聶勝瓊一首

蜀中妓一首

玉英一首

吳城小龍女一首

赤城韓夫人二首

衛芳華 一首

紫姑 一首

盧氏

天聖中氏父作縣今自漢州歸氏隨父行有詞題泥溪驛壁

蝶戀花

蜀道青天烟霧翳帝里繁華迢遞何時至  
回望錦川揮粉淚鳳釵斜亸烏雲膩  
綬帶雙垂金縷細玉珮珠璫  
露滴寒如水從此鸞妝添遠意  
畫眉學得遙山翠

舒氏

王齊叟彥齡之妻

點絳脣

獨自臨池悶來強把闌干凭舊愁新恨耗却年時興

驚散魚潛烟斂風初定波心靜照人如鏡少箇年時影

按尺堅支志云彥齡元祐中樞密彥霖弟也善為詞曲妻舒亦工篇翰而婦翁本出武列彥齡頗失禮於翁翁怒邀其女歸竟至離絕女在父家偶獨行池上懷其夫乃作此詞

魏夫人

丞相曾子宣之室

朱晦庵云本朝婦人能文者惟魏夫人及李易安二人而已

菩薩蠻

溪山掩映斜陽裏樓臺影動鴛鴦起隔岸兩三家出牆

紅杏花 綠楊堤下路早晚溪邊去三見柳綿飛離人  
猶未歸

好事近

雨後曉寒輕花外曉鶯啼歇愁聽隔溪殘漏正一聲淒  
咽 不堪西望去程賒離腸萬回結不似海棠花下按  
涼州時節

點絳脣

波上清風畫船明月人歸後漸消殘酒獨自凭欄久

聚散匆匆此恨年年有重回首淡烟疎柳隱隱蕪城漏

延安夫人

侯鯖錄云是蘇丞相子容之妹

更漏子

寄季玉妹

小闌干深院宇依舊當時別處朱戶鎖玉樓空一簾霜  
日紅弄珠江何處是望斷碧雲無際凝淚眼出重城  
隔溪羌笛聲

李清照

字易安格非之女嫁趙明誠有漱玉集一卷

張正夫云易安元宵永遇樂詞云落日鎔金暮雲合璧已自工緻至于染柳烟輕吹梅笛

怨春意知幾許氣象更好後疊云于今憔悴  
風鬟霜鬢怕向花間重去皆以尋常語度入  
音律鍊句精巧則易平淡入調者難且秋詞  
聲聲慢此乃公孫大娘舞劍手本朝非無能  
詞之士未曾有一下十四疊字者後疊又云  
到黃昏點點滴滴又使疊字俱無斧鑿痕怎  
生得黑黑字不許第二人押  
婦人有此奇筆殆間氣也

### 鳳凰臺上憶吹簫

香冷金猊被翻紅浪起來慵自梳頭任寶奩塵滿日上  
簾鉤生怕離懷別苦多少事欲說還休新來瘦非干病  
酒不是悲秋  
休休這回去也千萬遍陽關也則難留



念武陵人遠烟鎖秦樓惟有樓前流水應念我終日凝眸凝眸處從今又添一段新愁

壺中天慢

蕭條庭院又斜風細雨重門須閉寵柳嬌花寒食近種種惱人天氣險韻詩成扶頭酒醒別是閒滋味征鴻過盡萬千心事難寄樓上幾日春寒簾垂四面玉闌干慵倚被冷香消新夢覺不許愁人不起清露晨流新桐初引多少遊春意日高烟斂更看今日晴未

黃叔暘云  
前輩稱易

安綠肥紅瘦為佳句予謂寵柳嬌花  
語亦甚奇俊前此未有能道之者

### 一剪梅

紅藕香殘玉簟秋輕解羅裳獨上蘭舟雲中誰寄錦書  
來鴈字回時月滿西樓花自飄零水自流一種相思  
兩處閒愁此情無計可消除纔下眉頭却上心頭

### 醉花陰

九日

薄霧濃雲愁永晝瑞腦銷金獸佳節又重陽玉枕紗廚  
半夜涼初透東籬把酒黃昏後有暗香盈袖莫道不

銷魂簾卷西風人似黃花瘦

怨王孫

春暮

帝里春晚重門深院草綠階前暮天鴈斷樓上遠信誰  
傳恨綿綿多情自是多沾惹難擯舍又是寒食也秋  
千巷陌人靜皎月初斜浸梨花

浣溪沙

樓上晴天碧四垂樓前芳草接天涯勸君莫上最高梯  
新筍已成堂下竹落花都入燕巢泥忍聽林表杜鵑

啼

又

髻子傷春懶更梳  
晚風庭院落梅初  
淡雲來往月疎疎  
玉鴨薰爐閒瑞腦  
朱櫻斗帳掩流蘇  
通犀還解辟寒無

武陵春

風住塵香花已盡  
日晚倦梳頭  
物是人非事事休  
欲語淚先流  
聞說雙溪春尚好  
也擬汎輕舟  
只恐雙溪舴

艣舟載不動許多愁

點絳脣

寂寞深閨柔腸一寸愁千縷惜春春去幾點催花雨

倚遍闌干祇是無情緒人何處連天芳樹望斷歸來路

賣花聲

簾外五更風吹夢無踪畫樓重上與誰同記得玉釵斜  
撥火寶篆成空回首紫金峯雨潤烟濃一江春浪醉  
醒中留得羅襟前日淚彈與征鴻

聲聲慢

尋尋覓覓冷冷清清悽悽慘慘戚戚乍暖還寒時候最  
難將息三杯兩盞淡酒怎敵他曉來風急鴈過也正傷  
心却是舊時相識滿地黃花堆積憔悴損如今有誰  
堪摘守著窓兒獨自怎生得黑梧桐更兼細雨到黃昏  
點點滴滴這次第怎一箇愁字了得

阮逸女

花心動

仙苑春濃小桃開枝枝已堪攀折乍雨乍晴輕暖輕寒  
漸近賞花時節柳搖臺榭東風軟簾櫳靜幽禽調舌斷  
魂遠閒尋翠徑頓成愁結此恨無人共說還立盡黃

昏寸心空切強整繡衾獨掩朱扉簾枕為誰鋪設夜長  
更漏傳聲遠紗窓映銀釭明滅夢回處梅梢半籠淡月

幼卿

能改齋漫錄云宣和間有  
女子幼卿題詞陝府驛壁

賣花聲

極目楚天空雲雨無蹤謾留遺恨鎖眉峯自是荷花開

較晚孤負東風 客館歎飄蓬聚散匆匆揚鞭那忍驟  
花驄望斷斜陽人不見滿袖啼紅

吳淑姬

嫁士人楊子治有  
陽春白雪詞五卷

黃叔暘云淑姬詞

佳處不減李易安

惜分飛

送別

岸柳依依拖金縷是我朝來別處惟有多情絮故來衣  
上留人住 兩眼啼紅空彈與未見桃花又去一片征  
帆舉斷腸遙指茗溪路



祝英臺近

粉痕消芳信斷好夢總無據病酒無聊欹枕聽殘雨斷  
腸曲曲屏山溫溫沉水都是舊看承人處久離阻應  
念一點芳心閒愁知幾許偷照菱花清瘦自羞覷可堪  
梅子酸時楊花飛絮亂鶯又催將春去

朱淑真

錢塘人有斷腸集詞一卷

蝶戀花

送春

樓外垂楊千萬縷欲繫青春少住春還去猶自風前飄

柳絮隨春且看歸何處  
滿目山川聞杜宇便做無情  
莫也愁人意把酒送春春不語  
黃昏却下瀟瀟雨

眼兒媚

風日遲遲弄輕柔  
花徑暗香流  
清明過了不堪回首雲  
鎖朱樓  
午窓睡起鶯聲巧  
何處喚春愁  
綠楊影裏海棠枝畔紅杏梢頭

謁金門

春已半觸目此情無限  
十二闌干閒倚遍  
愁來天不管

好是風和日暖輸與鶯鶯燕燕滿院落花簾不卷斷  
腸芳草遠

生查子

元夕

去年元夜時花市燈如晝月上柳梢頭人約黃昏後  
今年元夜時月與燈依舊不見去年人淚濕春衫袖  
又

年年玉鏡臺梅蕊宮妝困今歲未還家怕見江南信  
酒從別後疎淚向愁中盡遙想楚雲深人遠天涯近

蔣興祖女

靖康間金兵入洛陽武蔣令興祖死之其女為金擄去題詞雄州驛中蔣令折西人

減字木蘭花

題雄州驛

朝雲橫度轆轤車聲如水去白草黃沙月照孤村三兩  
家飛鴻過也百結愁腸無晝夜漸近燕山回首鄉關  
歸路難

鄭意娘

楊思厚之妻撒八太尉自  
盱眙掠得之不辱而死

好事近

往事與誰論無語暗彈清血何處最堪腸斷是黃昏時

節 倚樓凝望又徘徊誰解此情切何計可同歸鴈趁  
江南春色

慕容崱卿妻

浣溪沙

滿目江山憶舊游汀花汀草弄春柔長亭驛住木蘭舟  
好夢易隨流水去芳心猶逐曉雲愁行人莫上望京

樓

平江雍熙寺月夜有客問婦人歌此詞傳之姑蘇品卿驚曰此余亡妻平生作也詢所由來正其妻殯處

孫道絢

號冲虛居士黃銖母

如夢令

宮詞

翠擘紅蕉影亂月上朱欄一半風自碧空來吹落歌珠  
一串不見不見人被繡簾遮斷

憶少年

葛氏姪女  
告歸送之

雨晴雲斂烟花淡蕩遙山凝碧驅車問征路賞春風南  
陌正雨後梨花幽艷白悔匆匆過了寒食歸家漸春  
暮探酴醾消息

秦樓月

季溫歸樵  
陽書寄

秋寂寞秋風夜雨傷離索傷離索老懷無奈淚珠零落  
故人一去無期約尺書忽寄西飛鶴西飛鶴故人何  
在水村山郭

鄭文妻孫氏

憶秦娥

絕妙作  
李嬰

花深深一鈎羅襪行花陰行花陰閒將柳帶試結同心  
耳邊消息空沈沈畫眉樓上愁登臨愁登臨海棠開

後望到如今

古杭雜記云文秀州人太學服膺齋上舍  
孫氏寄以詞一時傳播酒樓伎館皆歌之

燭影搖紅

乳燕穿簾亂鶯啼樹清明近隔簾時度柳花飛猶覺寒  
成陣長記眉峯偷隱臉桃紅猶藏酒暈背人微笑半彈  
驚釵輕籠蟬鬢別久啼多眼應不似當時俊滿園珠  
翠逞春嬌沒個他風韻若見賓鴻試問待相將綵箋寄  
恨幾時得見鬪草歸來雙鴛微潤

陸游妾

陸游之蜀宿一驛中見題壁詩詢之則驛中  
女也遂納為妾半載夫人逐之妾賦詞而別

生查子



只知眉上愁不識愁來路  
窓外有芭蕉陣陣黃昏雨  
曉起理殘妝整頓教愁去  
不合畫春山依舊留愁住

美奴

陸藻敬  
禮侍兒

如夢令

送別

日暮馬嘶人去船逐清波東注  
後夜最高樓還肯思量  
人否無緒無緒生怕黃昏疎雨

卜算子

送我出東門乍別長安道  
兩岸垂楊鎖暮烟正是秋光

老 一曲古陽關莫惜金尊倒君向瀟湘我向秦魚鴈  
何時到

王清惠

宋昭儀入元為  
女道士號冲華

滿江紅

題驛  
壁

太液芙蓉渾不是舊時顏色曾記得承恩雨露玉樓金  
闕名播蘭簪妃后裏暈潮蓮臉君王側忽一朝鼙鼓揭  
天來繁華歇 龍虎散風雲滅千古恨憑誰說對山河  
百二淚沾襟血驛館夜驚塵土夢宮車曉碾關山月願

嫦娥相顧肯從容隨圓缺

東園友聞云此詞或傳昭儀下張璠英所賦

徐君寶妻

岳州人被掠至杭其主者數欲犯之輒以計脫主者強焉告曰俟祭先夫然後為君

婦主者許諾乃焚香再拜題詞壁上投池中死

滿庭芳

題壁

漢上繁華江南人物尚遺宣政風流綠窓朱戶十里爛  
銀鈎一旦刀兵齊舉旌旗擁百萬貔貅長驅入歌樓舞  
榭風捲落花愁 治平三百載典章人物掃地都休幸  
此身未北猶客南州破鑒徐郎何在空惆悵相見無由

從今後斷魂千里夜夜岳陽樓

金德淑

宋宮人入元  
歸章丘李生

望江南

贈汪  
水雲

春睡起積雪滿燕山萬里長城橫縞帶六街燈火已闌

珊人在玉樓間

琴操

杭州伎後  
削髮為尼

滿庭芳

改少  
游詞

山抹微雲天連衰草畫角聲斷斜陽暫停征轡聊共飲

離觴多少蓬萊舊侶頻回首烟靄茫茫孤村裏寒鴉萬  
點流水遶紅牆魂傷當此際輕分羅帶暗解香囊謾  
贏得秦樓薄倖名狂此去何時見也襟袖上空有餘香  
傷心處長城望斷燈火已昏黃

能改齋漫錄云西湖有一倅間唱少游滿庭芳

誤舉畫角聲斷斜陽琴操在側云譙門非斜陽也倅因  
戲曰爾可改韻否琴操即改作陽字韻東坡聞而賞之

盼盼

瀘南  
官妓

惜春容

侑浩  
翁

少年看花雙鬢綠走馬章臺絃管逐而今老更惜花深

終日看花看不足 坐中美女顏如玉為我同歌金縷曲  
歸時厭得帽簷欹頭上春風紅簌簌

聶勝瓊

長安妓歸  
李之問

鷓鴣天

寄別  
李生

玉慘花愁出鳳城蓮花樓下柳青青尊前一唱陽關曲  
別箇人人第五程 尋好夢夢難成有誰知我此時情  
枕前淚共階前雨隔箇窓兒滴到明

蜀中妓

市橋柳 送行

欲寄意渾無所有折盡市橋官柳看君著上春衫又相  
將放船楚江口後會不知何日又是男兒須要鎮長  
相守苟富貴無相忘若相忘有如此酒

周公謹云  
詞亦可喜

玉英

蓬萊仙人  
見夷堅志

浪淘沙

塞上早春時煖律猶微柳舒金線水回隄料得江鄉應  
更好開盡梅蹊書漏漸遲遲愁損香肌幾回無語斂

雙眉凭遍闌干十二曲日下樓西

吳城小龍女

江亭怨

簾卷曲欄獨倚山展暮天無際淚眼不曾晴家在吳頭  
楚尾數點雪花亂委撲漉沙鷗驚起詩句欲成時沒  
入蒼烟叢裏

冷齋夜話云黃魯直登荊州亭柱間有此  
詞夜夢一女子云有感而作魯直驚悟曰

此必吳城  
小龍女也

赤城韓夫人



法駕導引

東風起東風起海上百花搖十八風鬟雲半動飛花和  
雨著輕綃歸路碧迢迢

又

烟漠漠烟漠漠天淡一簾秋自洗玉舟斟白醴月華微  
映是空舟歌罷海西流

紹興間都下有烏衣椎髻女子歌此詞凡九闕皆非人世語或

記之以問一道士道士驚曰此赤城韓夫人所製水府蔡真君法駕導引也烏衣女子疑龍云

衛芳華

永嘉滕穆僑居臨安月夜游聚景園遇一女鬼自言是衛芳華故宋理宗朝宮人

木蘭花慢

記前朝舊事曾此地會神仙向月地雲階重攜翠袖未  
拾花鈿繁華總隨流水歎一場春夢杳難圓廢港芙蓉  
滴露斷堤楊柳垂烟兩峯南北只依然輦路草芊芊  
恨別館離宮烟銷鳳蓋波沒龍船平生玉屏金屋對漆  
燈無焰夜如年落日牛羊塚上西風燕雀林邊

紫姑

吳興周權孫伯乾道五年知衢州西安縣  
招郡士沈延年邀致紫姑神賦牡丹詞

瑞鶴仙

賦一捻  
紅牡丹

觀嬌紅細捻是西子當日留心千葉西都競栽接好園  
林臺榭何妨日涉輕羅慢褶費多少陽和調燮向曉來  
露浥芳苞一點醉紅潮頰 雙靨姚黃國艷魏紫天香  
倚風羞怯雲鬟試插引動狂蜂蝶況東君開宴賞心樂  
事莫惜獻酬頻叠看相將紅藥翻堦尚餘滕妾

詞綜卷二十五

詞綜卷二十六

翰林院檢討朱彝尊編

金詞六十二首

完顏璫一首

蔡松年一首

吳激三首

劉仲尹二首

高士談一首

王庭筠三首

趙可一首

劉迎二首

王特起四首

韓玉三首

趙秉文一首

高憲一首

党懷英二首

王渥一首

景覃三首

王礪一首

趙攄一首

折元禮一首

劉著一首

李獻能一首

李晏一首

高永一首

段克己二首

段成己一首

元好問二十一首

王子可一首

鄧千江一首

完顏璫

字仲寶一字子瑜世宗之孫越王永功子自號樗軒居士封密國公宣宗南渡以開府儀

同三司奉朝請所著有如庵小藁

青玉案

凍雲封却駝岡路有誰訪溪梅去夢裏疎香風暗度覺  
來惟見一窓涼月瘦影無尋處明朝畫筆江天暮定  
向漁簑得奇句試問簾前淡幾許兒童笑道黃昏時候  
猶是廉纖雨

蔡松年

字伯堅從父靖除真定府判官遂為真定人累官吏部尚書參知政事遷尚書左丞封部國公進拜右丞相加儀同三司後又封衛國公卒加封吳國公謚文簡有蕭閑公集六卷

尉遲杯

紫雲暖恨翠雛珠樹雙栖晚小花靜院相逢的的風流  
心眼紅潮照玉盃午香重草綠宮羅淡喜銀屏小語私  
分麝月春心一點華年共有好願何時定妝鬟暮雨  
零亂夢似花飛人歸月冷一夜小山新怨劉郎興尋常  
不淺況不似桃花春溪遠覺情隨曉馬東風病酒餘香

相半

吳

激

字彥高建州人宋宰相拭之子朱芾之壻使金留不遣官翰林待制皇統初出知深州卒

有東山集詞一卷時彥高與伯堅才譽並推號吳蔡體

黃叔暘云彥高

詞精妙悽惋

風流子

感舊

書劍憶遊梁當時事底處不堪傷望蘭楫嫩漪向吳南  
浦杏花微雨窺宋東牆鳳城外燕隨青步障絲惹紫游  
韁曲水古今禁烟前後暮雲樓閣芳草池塘回首斷



人腸流年去如電雙鬢如霜欲遣從來遺恨頻近清觴  
聽出塞琵琶風沙浙瀝寄書鴻鴈烟月微茫不似海門  
潮信猶到潯陽

春從天上来

感舊

海角飄零歎漢苑秦宮墜露飛螢夢回天上金屋銀屏  
歌吹競舉青冥問當時遺譜有絕藝鼓瑟湘靈促哀彈  
似林鶯啞啞山溜泠泠梨園太平樂府醉幾度春風  
鬢髮星星舞徹中原塵飛滄海風雪萬里龍庭寫胡笳

幽怨人憔悴不似丹青酒微醒對一軒涼月燈火青燐  
黃叔暘云三山鄭中卿從張貴謨北使時聞彼中有歌  
此調者元遺山云曾見王防禦公玉說此詞皆用琵琶  
故實引據甚明惜不能記憶

人月圓

宴張侍御  
家有感

南朝千古傷心地還唱後庭花舊時王謝堂前燕子飛  
入人家恍然相遇天姿勝雪宮鬢堆鴉江州司馬青

衫淚濕同是天涯

洪景盧云先公在燕山赴北人張總  
侍御家集出侍兒佐酒中有一人意

狀摧抑可憐叩其故乃宣和殿小宮姬也坐客翰林直  
學士吳激作詞紀之聞者揮涕中州樂府云彥高賦

此時宇文叔通亦賦念奴嬌先成而頗近鄙俚及見彥高作茫然自失是後人有求作樂府者叔通即批云吳郎近以樂府名天下可往求之

劉仲尹

字致君蓋州人正隆中進士以潞州節度副使召為都水監丞有龍山集

浣溪沙

春情

繡館人人倦踏青粉垣深處簸錢聲賣花門外綠陰清  
簾幕風柔飛燕燕池塘花暖語鶯鶯有誰知道一春  
情

琴調相思引

蠶欲眠時日已曛柔桑葉大綠團雲羅敷猶小陌上看  
行人翠實低條梅弄色輕花吹攏麥初勻鳴鳩聲裏  
過盡太平村

高士談

字子文一字季默宣和末任忻州戶曹仕金為翰林直學士有蒙城集

減字木蘭花

西湖睡起飛絮游絲春老矣漲綠涵空十頃玻瓈四面  
風平時事少天與湖山供坐嘯他日西州却怕羊曇  
感舊遊

王庭筠

字子端蓋州熊岳人大定中登第官至翰林修撰晚年卜居黃華山自號黃華老人

訴衷情

夜涼清露滴梧桐庭樹又西風薰籠舊香猶在曉帳暖  
芙蓉雲淡薄月朦朧江湖殘夢半在南樓畫角聲中

蝶戀花

衰柳疎疎苔滿地十二闌干故國三十里南去北來人  
老矣短亭依舊殘陽裏紫蟹黃柑真解事似倩西風  
勸我歸歟未王粲登臨寥落際鴈飛不斷天連水

百字令

小雪家集作

山堂晚色滿疎籬寒雀烟橫高樹小雪輕盈如解舞故  
故穿簾入戶掃地燒香團圓一笑不道因風絮冰漸生  
硯問誰先得佳句有夢不到長安此心安穩只有歸  
耕去試問雪溪無恙否十里淇園佳處修竹林邊寒梅  
樹底准擬全家住柴門新月小橋誰掃歸路

趙可

字獻之高平人貞元二年進士仕至翰林直學士有玉峯散人集

望海潮

贈妓

雲垂餘髮霞拖廣袂人間自有飛瓊三館俊遊百街高  
選翩翩老阮才名銀漢會雙星尚相看脉脉似隔盈盈  
醉玉添春夢雲同夜惜卿卿離觴草草同傾記靈犀  
舊曲曉枕餘醒海外九州郵亭一別此生未卜他生江  
上數峯青恨斷雲殘雨不見高城二月遼陽芳草千里  
路傍情

劉迎

字無黨東萊人大定中進士除幽王府記  
室改太子司經有詩文樂府號山林長語

烏夜啼

離恨遠縈楊柳夢魂長遶梨花青衫記得章臺月歸路  
玉鞭斜 翠鏡啼痕印袖紅牆醉墨籠紗相逢不盡平  
生事春思入琵琶

又

菱鑑玉篴秋月蕙爐銀葉朝雲宿醒人困屏山夢烟樹  
小江村 翠甲未消蘭恨粉香不斷梅魂離愁分付殘  
春雨花外泣黃昏

王特起

字正之 嵎人 擢第  
為沁源令後為司監



喜遷鶯

別內

東樓歡宴記遺簪綺席題詩紈扇月枕雙欹雲窓同夢  
相伴小花深院舊歡頓成陳跡翻作一番新怨素秋晚  
聽陽關三疊一尊相餞留戀情纏繞紅淚洗妝雨濕  
梨花面鴈底關河馬頭星月西去一程程遠但願此心  
如舊天也不違人願再相見把生涯分付藥爐經卷

又

登山臨水正桂嶺瘴開頻州風起元鶴高翔蒼鷹遠擊

白鷺欲飛還止江上層波似練沙際行人如蟻目斷處  
見遙峯簇翠殘霞浮綺千里關塞遠鴈陣不來猶把  
闌干倚數疊悲茄一行征旆城郭幾番成毀白塔前朝  
陵寢青嶂故都營壘念往事但寒烟滿目愁蟬盈耳

又

題郝仙  
女廟壁

汀洲蘋滿記翠籠采采相將鄰媛蒼渚烟生金支光爛  
人在霧綃鮫館小鬟頻成雲散羅襪凌波不見翠鸞遠  
但清溪如鏡野花留靨情睠驚變現身後神功絲滿

吳蠶繭漢女菱歌湘妃瑤瑟香動倚雲層殿彤車載花  
一色醉盡碧桃清讌故山晚歎流年一笑人間飛電

梅花引

山之麓河之曲一灣秀色盤虛谷水溶溶雨濛濛有人  
行李蕭蕭落葉中人家籬落炊烟濕天外雲峯迷淡  
碧野雲昏失前村溪橋路滑平沙沒舊痕

韓玉

字溫甫北平人擢第八翰林為應奉文  
字後為鳳翔府判官有東浦詞一卷

感皇恩

廣東與  
康伯可

遠柳綠含烟土膏才透雲海微茫露晴岫故鄉何在夢  
寐草堂溪友舊時遊賞處誰攜手塵世利名於身何  
有老丟生涯殢樽酒小橋流水一樹雪香寒瘦故人今  
夜月相思否

減字木蘭花

贈歌者

香檀素手緩理新詞來伴酒音調淒涼便是無情也斷  
腸莫歌楊柳記得渭城朝雨後客路茫茫幾度東風  
蕙草長

賀新郎

柳外鶯聲碎。晚晴天、東風力軟，嫩寒初退。花底覓春春已去，時見亂紅飛墜。又閒傍、闌干十二。欄外青山烟縹緲，遠連空、愁與眉峯對。凝望處，兩疊翠。  
犀佩綺屏深。香羅帳、小寶檠燈背。誰謂彩雲和夢斷，青翼阻、尋後會。待都把相思情綴，便做錦書難寫。恨奈菱花都見人憔悴。那更有、枕函淚。

趙秉文

字周臣，磁州人。推第入翰林，因言事外補。後再入館，為修撰，待制，轉禮部郎中，出典岢嵐。

平定寧邊三郡南渡為直學士遷侍讀拜禮  
部尚書再改翰林學士自號閑閑居士所著  
有溢  
水集

### 青杏兒

風雨替花愁風雨罷花也應休勸君莫惜花前醉今年  
花謝明年花謝白了人頭乘興兩三甌揀溪山好處  
追遊但教有酒身無事有花也好無花也好選甚春秋

高憲

字仲常遼東人王庭筠之甥泰和三年登第仕博州防禦判官

貧也樂

城下路淒風露今人犁田昔人墓岸頭沙帶蒹葭漫漫  
昔時流水今人家 黃埃赤日長安道倦客無漿馬無  
草開函關閉函關千古如何不見一人間

党懷英

字世傑其先馮翊人後居泰安宋太尉進士  
一代孫舉進士官翰林學士承旨卒謚文獻

有竹

谿集

感皇恩

一葉下梧桐新涼風露喜鵲橋成渺雲步舊家機杼巧  
纖紫綃如霧新愁還織就無重數 天上何年人間朝

暮回首星津又空渡  
盈盈別淚散作半空疎  
雨離魂都付與秋將去

月上海棠

傲霜枝裊團珠蕾  
冷香霏烟雨晚秋意蕭散繞東籬  
尚彷彿見山清氣西風外夢到斜川栗里  
斷霞魚尾明  
秋水帶三兩飛鴻點  
烟際疎林颯秋聲似知人倦游無  
味家何處落日西山紫翠

王 渥

字仲澤太原人擢第令寧陵召為省掾使宋  
回為太學助教充樞密院經歷官遷右司都



事天興中出  
援武仙戰歿

水龍吟

從商帥國器  
獵同裕之賦

短衣匹馬清秋慣，曾射虎南山下。西風白水，石鯨鱗甲，  
山川圖畫。千古神州，一時勝事，賓僚儒雅。快長堤萬弩，  
平岡千騎，波濤卷，魚龍夜。落日孤城鼓角，笑歸來，長  
圍初罷。風雲滲澹，貔貅得意，旌旗閒暇。萬里天河，更須  
一洗中原，兵馬看鞬橐。鳴咽咸陽道，左拜西還，駕

景覃

字伯仁華陽人  
自號渭濱野叟

天香

市遠人稀林深犬吠山連水村幽寂田里安閒東鄰西  
舍淮擬醉時歡適社祈雨禱有簫鼓喧天吹擊宿雨新  
晴隴頭閒看露桑風麥無端短亭暮驛恨連年此時  
行役何似臨流蕭散緩衣輕幘炊黍烹鷄自勞有脆綠  
甘紅薦芳液夢裏春泉糟牀夜滴

又

百歲中分流年過半塵勞繫人無盡桑柘週圍管茅低

架且喜水親山近倦飛高鳥算也有閒枝栖穩紙帳練  
衾日高睡起懶梳蓬鬢閒堦土花碧潤緩芳鞵恐傷  
蝸蚓側掩衡門空解草玄誰信俗駕輕雲易散賴獨有  
蓮峯破孤悶世事悠悠從教莫問

鳳栖梧

倦客情悰紛似縷小院無人臥聽秋蟲語歸意已撓新  
鴈去晚涼更作瀟瀟雨架上秋衣蠅點素冷菊殘妝  
尚被春風妒別有溪山容杖屨等閒不許知人處

王

礪

字逸賓汴梁人以丞相馬吉甫舉德行才能授鹿邑主簿就乞致仕

浣溪沙

夢中作

林樾人家急暮砧夕陽人影入江深倚欄疎快北風襟  
雨自北山明處黑雲從白鳥去邊陰幾多秋思亂鄉

心

趙

攄

字子充宛平人官內翰自號醉全道人

南歌子

澗草萋萋綠林鶯恰恰啼汀沙過雨便無泥換得芒屨

隨意到前溪  
浦澈渾堪畫  
雲烟總是題  
江湖老伴一  
蓑衣  
真箇斜風細雨不須歸

折元禮

官治中

望海潮

從軍舟中作

地雄河岳疆分  
韓晉潼關高壓秦頭  
山倚斷霞江吞絕  
壁野烟縈帶滄洲  
虎旆擁貔貅  
看陣雲截岸霜氣橫秋  
千雉嚴城五更殘  
角月如鉤  
西風曉入貂裘恨  
儒冠誤我却  
羨兜鍪  
六郡少年三關老將  
賀蘭烽火新收天

外嶽蓮樓想斷雲橫曉誰識歸舟刺著黃金換酒羯鼓  
醉涼州

劉著

字鵬南皖城人宣政末登進士第仕金  
官翰林脩撰出守武遂終忻州刺史

鷓鴣天

雪照山城玉指寒一聲羌管怨樓間江南幾度梅花發  
人在天涯鬢已斑  
星點點月團團倒流河漢入杯盤  
翰林風月三千首寄與吳姬忍淚看

李獻能

字欽叔河中人擢第入翰林為應奉出為郎  
州觀察判官再入遷脩撰正大末授河中帥

府經  
歷官

春草碧

紫簫吹破黃昏月  
簌簌小梅花飄香雪  
寂寞花底風鬟  
顏色如花命如葉  
千里沈凝塵淩波襪  
心事鑑影鸞  
孤箏絃鴈絕  
舊時雪堂人  
今華髮腸斷金縷新聲杯深  
不覺琉璃滑  
醉夢遶南雲  
花上蜨

李晏

字致美高平人  
皇統中進士官至禮部尚書翰林學士承旨卒謚文簡

虞美人

佳人酒暈潮生頰  
艷艷霞千疊  
雨餘紅淚濕  
黃昏誤認  
當年人面倚朱門  
飄零又送青春暮  
悵望劉郎去  
教人不恨五更風  
只恨馬蹄無處避殘紅

高

永

字信卿初名夢字舜卿又名揆漁陽人累舉不第正大末上書不報自號應菴

大江西上曲

滕王閣

閒登高閣歎興亡  
滿目風烟塵土盡  
棟珠簾當日事不  
見朝雲暮雨秋水長  
天落霞孤鶩千載名如故  
長空澹澹去鴻嘹唳誰數  
遙憶才子當年如椽健筆  
坐上題



佳句物換星移知幾度遺恨西山南浦往事無憑昔人  
安在漫向尋歌舞長江東注為誰流盡今古

段克己

字復之河東人進士入元  
不仕有遜齋樂府一卷

漁家傲

龍尾溝邊飛柳絮虎頭山下花無數花底醉眠留杖屨  
花上露隨風散漫飄香霧老去逢春能幾度不妨且  
作風流主明日不知風共雨回首處夕陽又下西山去

又

詩句一春渾漫賦

一作與

紛紛紅紫俱塵土樓外垂楊千

萬縷風落絮闌干倚遍空無語

畢竟春歸何處所樹

頭樹底無尋處惟有閒愁將不去依舊住伴人直到黃

昏雨

段成已

字誠之克已弟進士主宜陽簿  
入元不仕有菊軒樂府一卷

大江東去

送楊國瑞南歸

西風湓浦鴈初飛秋水渺茫無際有底忙時來復去汎  
若虛舟不繫離菊將開村醪初熟且住為佳耳笑言相

答個中吏隱無愧 歲月不貸閒人君顏非少我髮白

如此好把金杯休去手萬事惟消沉醉日轉山腰馬嘶

柳外歌闌行人起憑高西望相思目斷烟水

元好問

字裕之秀容人興定五年進士歷官左司都事轉行尚書省左司員外郎金亡不仕有遺

山集

張叔夏云遺山詞深于用事精于鍊句風流蘊藉處不減周秦

水調歌頭

賦德新王丈玉溪溪在嵩前費莊兩山絕勝處也

空濛玉華曉瀟洒石淙秋高高大有佳處元在玉溪頭

翠壁丹崖千丈古木寒藤兩岸村落帶林丘今日好風  
色可以放吾舟 百年來算惟有此翁游山川邂逅佳  
客猿鳥亦相畱父老雞豚鄉社兒女藍輿竹几來往亦  
風流萬事已華髮吾道付滄州

木蘭花慢

遊三臺

渺漲江東下流不盡古今情記海上三山雲中雙闕當  
日南城黃鶴幾年飛去淡春陰平野草青青冰井猶殘  
石甃露盤已失金莖 風流千古短歌行慷慨缺壺聲

想醺酒臨江賦詩按馬詞氣縱橫飄零舊家王粲似南  
飛鳥鵲月三更笑殺西園賦客壯懷無復平生

最高樓

商於魯  
縣志山

商於路山遠客來稀雞犬靜柴扉東家勸飲薑芽脆西  
家留宿芋魁肥覺重來依舊鷓鴣總忘機問華屋高資  
誰不戀問美食大尊誰不羨風浪裏竟安歸雲山既不  
求吾是林泉又不責吾非任年年藜藿飯芟荷衣

玉漏遲

有懷浙  
江別業

浙江歸路杳西南却羨投林高鳥升斗微官世累苦相  
縈繞不如麒麟畫裏又不與巢由同調時自笑虛名負  
我半生吟嘯擾擾馬足車塵被歲月無情暗消年少  
鍾鼎山林一事幾時曾了四壁秋蟲夜雨更一點殘燈  
斜照清鏡曉白髮又添多少

滿江紅

一枕餘醒厭厭共相思無力人語定小窗風雨暮寒岑  
寂繡被畱歡香未減錦書封淚紅猶濕問寸腸能著幾

多愁朝還夕 春草遠春江碧雲黯淡花狼藉更柳綿  
閒颺柳絲難織入夢終疑神女賦寫情除有文通筆恨  
伯勞東去燕西飛空相憶

石州慢

赴台史館與秀新丈別去岳祠西新店明日以此寄之

擊筑行歌按馬賦詩年少豪舉從渠里社浮沉狂笑人  
問兒女生平王粲而今憔悴登樓江山信美非吾土天  
地一飛鴻渺翩翩何許 羈旅山中父老相逢應念此  
行良苦幾為虛名誤却東家雞黍漫漫長路蕭蕭兩鬢

黃塵騎驢漫與行人語  
詩句欲成時滿西山風雨

### 洞仙歌

黃塵鬢髮六月長安道  
羞向清溪照枯槁  
似山中遠志謾出山來成箇甚  
只是人間小草  
昇平十二策丞相封侯說與高人應笑倒  
對清風明月展放眉頭長恁地  
大醉高歌也好待都把功名付時流  
只求箇天公放教空老

### 江神子

夢德新文因  
及欽叔舊遊



河山亭上酒如川，玉堂仙重畱連。  
猶恨春風桃李負芳年，燕語鶯啼，  
花落處，歌扇後，舞衫前。  
舊遊風月夢相牽，路三千，  
去無緣。滅沒飛鴻一線，  
入秋烟。白髮故人，  
健否西北望，一潸然。

又觀別

旗亭誰唱渭城詩，酒盈卮。  
兩相思，萬古垂楊，都是折殘枝。  
舊見青山青似染，緣底事，  
淡無姿。情緣不到木腸兒，  
鬢成絲。更須辭。只恨芙蓉，  
秋露冷，胭脂為問世間離。

別淚何日是滴休時

臨江仙

自洛陽往孟津道中作

今古北邙山下路黃塵老盡英雄人生長恨水長東幽  
懷誰共語遠目送歸鴻蓋世功名將底用從前錯怨  
天公浩歌一曲酒千鍾男兒行處是未要論窮通

又

寄德新丈

自笑此身無定在北州又復南州買田何日遂歸休向  
來凡落落此去亦悠悠赤日黃塵三百里高丘幾度

登樓故人多在玉溪頭  
清泉明月曉高樹  
亂蟬秋

又  
內鄉  
北山

夏館秋林山水窟  
家家林影湖光三年閒  
為一官忙簿  
書愁裏過  
筍蕨夢中香  
父老書來招我隱  
臨流已蓋  
茅堂白頭兄弟共  
論量  
山田尋二頃  
他日作桐鄉

鵲橋仙

梨花春暮垂楊秋  
晚歸袖無人重挽  
浮雲流水十年間  
算只有青山在眼  
風臺月榭朱脣檀板  
多病全疎酒

盡劉郎爭得似當時比前度心情又減

鷓鴣天

隆德故宮同希顏  
欽叔知幾諸人賦

臨錦堂前春水波蘭皋亭下落梅多三山宮闕空銀海  
萬里風埃暗綺羅雲子酒雪兒歌留連風月共婆娑  
人間更有傷心處奈得劉伶醉後何

又

華表歸來老令威頭皮留在姓名非舊時逆旅黃梁飯  
今日田家白板扉沽酒市釣魚磯愛閒直與世相違

墓頭不要征西字元是中原一布衣

太常引

東原上清宮同楊飛卿夜話  
汝梁舊遊追懷欽叔內翰

十年流水共行雲相見重情親  
滄海內揚塵便疑是前身  
身後身 風臺月榭舞裙歌扇樂事幾回新  
莫話洛陽春更誰似金鑾故人

清平樂

憶鎮陽

悲歡聚散世事天誰管  
梳去梳來雙鬢短  
鏡裏看看雪滿  
燕南十月霜寒孤身去住都難  
何日西窓燈火眼

前兒女團圓

又

離腸宛轉瘦覺妝痕淺飛去飛來雙乳燕消息知郎近  
遠樓前小雨珊珊海棠簾幕輕寒杜宇一聲春去樹  
頭無數青山

買陂塘

太和五年乙丑歲赴試并州道逢捕鴈者云今日獲一鴈殺之矣其脫網者悲鳴不能去竟自投于地而死予因買得之葬之汾水之上累石為識號曰鴈丘并作鴈丘詞

問世間情是何物直教生死相許天南地北雙飛客老

翅幾回寒暑歡樂趣離別苦就中更有癡兒女君應有  
語渺萬里層雲千山暮雪隻影向誰去 橫汾路寂寞  
當年簫鼓荒烟依舊平楚招魂楚些何嗟及山鬼暗啼  
風雨天也如未信與鶯兒燕子俱黃土千秋萬古為畱  
待騷人狂歌痛飲來訪鴈丘處

點絳脣

醉裏春歸綠窓猶唱畱春住問春何處花落鶯無語  
渺渺予懷漠漠烟中樹西樓暮一簾疎雨夢裏尋春去

江月晃重山

初到高山作

寒上秋風鼓角城頭落日旌旗少年鞍馬適相宜從軍  
樂莫問所從誰 候騎纔通冀北先聲已動遼西歸期  
猶及柳依依春閨月紅袖不須啼

王予可

字南雲  
吉州人

生查子

夜色靜明河風好來千里水殿謫仙人皓齒清歌起  
前聲金尊中後調銀河底一夜嶺頭雲遶遍樓前水



鄧千江

臨洮人

望海潮

獻張六太尉

雲雷天塹金湯地險名藩自古皐蘭營屯繡錯山形米  
聚襟喉百二秦關鏖戰血猶殷見陣雲冷落時有雕盤  
靜塞樓頭曉月依舊玉弓彎看看定遠西還有元戎

聞令上將齋壇區脫畫空兗鈴夕解甘泉又報平安吹


笛虎牙間且宴陪珠履歌按雲鬟招取英靈毅魄長統

賀蘭山

陶九成云近世所謂大曲蕪小小蝶戀花蘇東坡念奴嬌晏叔原鷓鴣天柳耆卿雨淋鈴辛稼

軒摸魚子吳彥高春草碧茶伯堅石州慢張  
子野天仙子朱淑真生查子鄧千江望海潮

詞綜卷二十六



總校官庶吉士臣張能照  
校對官中書臣潘庭筠  
謄錄監生臣王永年  
謄錄監生臣張德燾

欽定四庫全書薈要

集部

詞綜卷二十八

七

詳校官編修臣繆晉



詞綜卷二十七

翰林院檢討朱彝尊編

元詞五十三首

許衡 一首

張宏範 一首

劉秉忠 一首

燕公楠 一首

程鉅夫 四首

盧摯 一首

劉敏中 一首

楊果 一首

仇遠 二首

李冶 三首



王惲

八首

趙孟頫

五首

劉因

二首

梁曾

一首

陳孚

二首

汪宗臣

一首

姚雲文

四首

詹正

四首

吳澄

一首

彭元遜

四首

羅志仁

四首

韋居安

一首

許衡

字仲平河內人被召為京兆提學累官集賢

大學士兼國子祭酒領太史院事贈祭祿大

夫司徒謚文正加贈太傅開府儀同三司

魏國公從祀孔子廟庭有魯齋先生集

滿江紅

別大名親舊

河上徘徊未分袂孤懷先怯中年後此般憔悴怎禁離  
別淚苦滴成襟畔濕愁多擁就心頭結倚東風搔首謾  
無聊情難說黃卷在消白日青鏡裏增華髮念歲寒  
交友故山烟月虛負人生歸去好誰知美事難雙得計  
從今佳會幾何時長相憶

張宏範

字仲疇定興人官至鎮國上將軍江東道宣慰使贈銀青榮祿大夫平章政事謚武略加

贈太師開府儀同三司上柱國齊國公改謚忠武延祐中追封淮陽王更謚獻武



臨江仙

憶舊

千古武陵溪上路  
桃源流水潺潺  
可憐仙侶剩濃歡  
黃鸝驚夢破青鳥喚春還  
回首舊遊渾不見  
蒼烟一片荒山  
玉人何處倚闌干  
紫簫明月底翠袖暮雲寒

劉秉忠

字仲晦邢州人少為僧隨其師海雲入見世祖遂留之從代宗時人稱為聰書記至元初拜光祿大夫位太保參預中書省事卒贈太師封趙國公諡文貞成宗時加贈太師諡文正仁宗時進封常山王有藏春散人集

乾荷葉

乾荷葉色蒼蒼老柄風搖蕩減清香越添黃都因昨夜  
一番霜寂寞秋江上

燕公楠

字國材江州人至元初辟贛州通判累官  
資德大夫湖廣行中書省右丞有五峯集

摸魚兒

答程雪樓見壽

又浮生平頭六十登樓悵望荆楚出山小草成何事閒  
却竹烟松雨空自許早搖落江潭一似琅琊樹蒼蒼天  
路謾伏檻心長銜圖志短歲晏欲誰與  
梅花賦飛墮  
高寒玉宇鐵腸還解情語英雄操與君侯耳過眼羣兒

誰數霜鬢縷祇夢曉枝頭翡翠催歸去清觴飛羽且細酌盱泉酣歌郢雪風致美無度

程鉅夫

原名文海避武宗諱以字行其先休寧人後徙居郢至鉅夫始遷建昌仕世祖官翰林學士承旨贈光祿大夫追封楚國公諡文憲有雪樓集詞一卷

摸魚兒

青燕五峯右丞

記江梅向來輕別相逢今又平楚東風小試南枝煖早已千林烟雨春幾許向五老仙家移下瓊瑤樹溪橋驛路更月曉堤沙霜秋野水疎影自容與平生事幾度

含章殿宇隔花么鳳能語苔枝夭矯蒼龍瘦誰把冰鬚  
細數千萬縷簇一點芳心待與和羹去移宮換羽且度  
曲傳觴主人花下今日慶初度

又  
次韻寧疎齋  
題寒亭

問疎齋湘中朱鳳何如江上鸚鵡波寒木落人千里客  
裏與誰同注茅屋趣吾自愛吾亭更愛參天樹勞君為  
賦  
渺雪鴈南飛雲濤東下歲晏欲何處  
疎齋老意氣  
經文緯武平生握手相許江南江北尋芳路共看碧雲

來去黃鸝舉記我度秦淮君正臨清句

宣城水名

歌聲緩與

怕徑竹能醒庭花起舞驚散夜來雨

點絳脣

送王蓋臣

綠鬢青雲王郎故是乘驄侶阿龍風度想在烏衣住

帶得春來又共春歸去江頭路美人何處官柳吹風絮

清平樂

西野使君自遼左寄詩詞至  
灤陽猥承見及次韻代說

新來酒戶想勝看花處帶得春行平壤路同笑同歌同

住灤陽却近山家芒鞋夜夜丹霞流水落花歸思蒼

烟白石生涯

盧 摯

字處道疏疎齋涿州人仕至翰林學士元初稱能詩者以劉因盧摯為首有疎齋集

摸魚兒

題雪樓先生歲寒亭詩卷

為君歌歲寒亭子無煩州畔鸚鵡江山勝槩風霜地要  
近魯東家住丘壑趣應素夢丹青老柏孤松樹登高作  
賦想白雪陽春碧雲日暮別有倚樓處 金閨彥尚憶  
西清接武年來喬木如許團茅時復羲皇上我醉欲眠  
卿去歌欲舉還自悟君家琢就瓊瑤句疎齋試與倩倚

竹佳人湘絃赴節涼滿北窓雨

劉敏中

章丘人至元中為監察御史累遷翰林學士承旨卒諡文簡有中齋集

點絳脣

寄程雪樓

短夢驚回北窓一陣芭蕉雨雨聲還住斜日明高樹

起望行雲送雨前山去山如霧斷虹猶怒直入山深處

楊果

字正卿號西菴蒲陰人金正大中進士入元為北京宣撫使拜參知政事出為淮孟路總

管卒諡文獻有集

摸魚兒

同遺山賦鴈丘

悵年年鴈飛汾水秋風依舊蘭渚網羅驚破雙栖夢孤  
影亂翻波素還碎羽算古往今來只有相思苦朝朝暮  
暮想塞北風沙江南烟月爭忍自來去埋恨處依約  
并門舊路一丘寂寞寒雨世間多少風流事天也有心  
相妒休說與還却怕有情多被無情誤一杯會舉待細  
讀悲歌滿傾清淚為爾酹黃土

仇遠

字仁近錢塘人官溧陽州儒學教授一時遊其門者若張雨張翥莫維賢皆有名當世所

著有山

村集



八犯玉交枝

招寶山  
觀月上

滄島雲連綠瀛秋入暮景却沉洲渚無浪無風天地白  
聽得潮生人語擎空孤柱翠倚高閣憑虛中流蒼碧迷  
烟霧惟見廣寒門外青無重數 不知是水是山不知  
是樹漫漫知是何處倩誰問凌波輕步謾凝睇乘鸞秦  
女想庭曲霓裳正舞莫須長笛吹愁去怕喚起魚龍三  
更噴作前山雨

齊天樂

賦蟬

夕陽門巷荒城曲清音早鳴秋樹薄剪綃衣涼生鬢影  
獨飲天邊風露朝朝暮暮奈一度淒吟一番淒楚尚有  
殘聲薦然飛過別枝去齊宮往事謾省行人猶與說  
當時齊女雨歇空山月籠古柳彷彿舊曾聽處離情正  
苦甚懶拂冰箋倦拈琴譜滿地霜紅淺莎尋蛻羽

李

冶

字仁卿樂城人金進士辟和鉤州事城潰微服北渡流落忻崞間世祖聞其賢召之未仕

晚家封龍山下至元初再以學士召就職暮月以老病辭去有敬齋集

買陂塘

和元遺山鴈丘

鴈雙雙正分汾水回頭生死殊路天長地久相思債何  
似眼前俱去摧勁羽倘萬一幽冥却有重逢處詩翁感  
遇把江北江南風嘹月唳并付一丘土 仍為汝小草  
幽蘭麗句聲聲字字酸楚拍江秋影今何在宰木欲迷  
隄樹霜魂苦算猶勝王嬙青塚真娘墓憑誰說與對鳥  
道長空龍艘古渡馬耳淚如雨

又 大名有男女以私情不遂赴水者後三  
日二尸相携出水濱是歲陂荷俱並蒂

為多情和天也老不應情遽如許請君試聽雙燕怨方

見此情真處誰點注香漱灩銀塘對抹胭脂露藕絲幾  
縷絆玉骨春心金沙曉淚漠漠瑞紅吐連理樹一樣  
驪山懷古古今朝暮雲雨六郎夫婦三生夢幽恨從來  
艱阻須念取其鴛鴦翡翠照影長相聚秋風不住悵寂  
寞芳魂輕烟北渚涼月又南浦

鷓鴣天

中秋同諸山僧飲文仲  
家蓮花白醉中賦此

太乙滄波下酒星露醺祕訣出仙局情知天上蓮花白  
壓盡人間竹葉青迷晚色散秋馨兵廚曉溜玉泠泠

楚江雲錦三千頃笑殺靈均語獨醒

王惲

字仲謀汲縣人官至翰林學士嘉議大夫累進中奉大夫贈翰林學士承旨資善大夫追封太原郡公諡文定

有秋澗集四卷

春從天上来

見故宮人感賦

羅綺深宮記紫袖雙垂當日昭容錦封香重彤管春融  
帝座一點雲紅正臺門事簡更捷奏清晝相同聽鈞天  
侍瀛池內宴長樂歌鐘回頭五雲雙闕恍天上繁華  
玉殿珠櫳白髮歸來昆明灰冷十年一夢無踪寫杜娘

哀怨和淚點彈與孤鴻淡長空看五陵何似無樹秋風

點絳脣

送董秀才西上

楊柳青青玉門關外三千里秦山渭水未是消魂地

坦臥東牀恐減風雲氣功名際願君著意莫搵春閨淚

水龍吟

賦秋日紅梨花

纖苞淡貯幽香玲瓏輕銷秋陽麗仙根借煖定應不待

荆王翠帔瀟灑輕盈玉容渾是金莖露氣甚西風宛轉

東欄暮雨空點綴真妃淚誰遣司花妙手又一番角

奇爭異使君高臥竹亭閒寂故來相慰燕几螺屏一枝  
披拂繡簾風細約洗妝快瀉玉屏芳酒枕秋蟾醉

平湖樂

採蓮人語隔秋烟波靜如橫練入手風光莫流轉共留  
連畫船一笑春風面江山信美終非吾土問何日是  
歸年

又

秋風湖上水增波水底雲陰過憔悴湘纍莫輕和且高

歌 凌波幽夢誰驚破佳人望斷碧雲暮合道別後意  
如何

又

安仁雙鬢已驚秋更甚眉頭皺一笑相逢且開口玉為  
舟 新詞淡似鶯黃酒醉歸扶路竹西歌吹人道似揚  
州

又

秋風嫋嫋白雲飛人在平湖醉雲影湖光淡無際錦屏



園故人遠在千山外百年心事一樽濁酒長使此心  
違

後庭花破子

晚明臨武堂

綠樹遠連洲青山壓樹頭落日高城望烟霏翠滿樓木  
蘭舟彼汾一曲春風佳可遊

趙孟頫

字子昂宋太祖子秦王德芳之後四世祖伯圭賜第湖州遂為湖州人宋末為真州司戶

叅軍至元中以程鉅夫薦入見授兵部郎中累官翰林學士承旨榮祿大夫卒追封魏國

公諡文敏有松雪詞一卷

邵復孺云公以承平王孫而嬰世變黍離之  
悲有不能忘情者故長短句深得騷人意度

### 後庭花破子

清溪一葉舟芙蓉兩岸秋採菱誰家女歌聲起暮鷗亂  
雲愁滿頭風雨帶荷葉歸去休

### 蝶戀花

儂是江南遊冶子烏帽青鞋行樂東風裏落盡楊花春  
滿地萋萋芳草愁千里扶上蘭舟人欲醉日暮青山  
相映雙蛾翠萬頃湖光歌扇底一聲吹下相思淚

虞美人

浙江舟中作

潮生潮落何時了，斷送行人老。  
消沉萬古意無窮，盡在長空澹澹鳥飛中。  
海門幾點青山小，望極烟波渺。  
何當駕我以長風，便欲乘桴浮到日華東。

浣溪沙

李叔同丞相會間贈歌者貴貴

滿捧金卮低唱詞，樽前再拜索新詩。  
老夫髣髴鬢成絲。羅袖染將修竹翠，  
粉香湏上小梅枝。相逢不似少年時。

浪淘沙

今古幾齊州。華屋山丘。杖藜徐步立芳洲。無主桃花開  
又落。空使人愁。沙上往來舟。萬事悠悠。春風曾見昔  
人遊。惟有石橋橋下水。依舊東流。

劉因

字夢吉。容城人。至元中徵授承德郎。右賢善  
大夫。以母疾歸。尋以集賢學士。嘉議大夫。徵  
固辭。卒。贈翰林學士。資善大夫。護軍。追  
封容城郡公。謚文靖。有靜脩集詞一卷。

木蘭花

未開常探花開未。又恐纔開風雨至。花開風雨不相妨。

為甚不來花下醉  
今年休作明年計  
明日已非今日  
事春風欲勸坐中人  
一片落紅當眼墜

鵲橋仙

喜雨

紆千生處幾時飛去  
欲去被天留住  
野人得飽更無求  
滿意看一犁春雨  
田家作苦  
濁醪釀黍  
准備歲時歌  
舞不妨分我一豚蹄  
更試聽清秋社鼓

梁曾

字貢父燕人以薦起歷官湖南宣慰司副使

改淮西宣慰司副使兩使安南授吏部尚書

改授淮安路總管累遷昭

文館大學士資德大夫

木蘭花慢

西湖  
送春

問花花不語為誰落為誰開算春色三分半隨流水半  
入塵埃人生能幾歡笑但相逢尊酒莫相推千古幕天  
席地一春翠繞珠圍彩雲回首暗高臺烟樹渺吟懷  
揅一醉留春留春不住醉裏春歸西樓半簾斜日怪銜  
春燕子却飛來一枕青樓好夢又教風雨驚回

陳孚

字剛中臨海人至元中官翰林待制兼國史  
院編修繼出為台州路總管府治中有集

太常引

端陽日當母  
誕不得歸

絲絲堂上簇蘭翹記生母在今朝無地捧金蕉奈烟水  
龍沙路遙碧天迢遞白雲何處風急雨瀟瀟萬里夢  
魂消待飛逐錢唐夜潮

又

短衣孤劍客乾坤奈無策報親恩三載隔晨昏更疎雨  
寒燈斷魂赤城霞外西風鶴髮猶想倚柴門蒲醑謾  
盈尊倩誰寫青衫淚痕

汪宗臣

字公輔號紫巖婺源人與  
方虛谷交善有集四卷

蝶戀花

清明前兩日開燕

年去年來來去早怪底不來庭院春光老知向誰家翻  
別調家家望斷飛踪杳千里瀟湘烟渺渺不記雕梁  
舊日思多少逼近清明纔一到故巢猶在朱檐曉

姚雲文

字聖瑞高安人宋咸淳進士入元授承直郎撫建兩路儒學提舉有沼村遺稿

摸魚兒

艮岳

渺人間蓬瀛何許一朝飛入梁苑輞川梯洞層崖出猶  
帶鬼愁龍怨窮遊宴談笑裏金風吹折桃花扇翠華天



遠帳莎沿螢粘錦屏烟合草露泣蒼蘚  
東華夢好在  
牙檣瑤輦畫圖歷歷曾見落紅萬點孤臣淚斜日牛羊  
春晚摩雙眼看塵世鰲宮又報鯨波淺吟鞭拍斷便乞  
與媧皇化成精衛填不盡遺憾

紫萸香慢

九日

近重陽偏多風雨絕憐此日暄明問秋香濃未待携客  
出西城正自羈懷多感怕荒臺高處更不勝情向尊前  
又憶漉酒插花人只坐上已無老兵  
淒清淺醉還醒

愁不肯與詩平記長楸走馬雕弓  
揜柳前事休評紫萸  
一枝傳賜夢誰到漢家陵儘烏紗  
便隨風去要天知道  
華髮如此星星歌罷涕零

玲瓏玉

半閑堂  
賦春雪

開歲春遲早贏得一白瀟瀟風窓  
漸軟夢驚錦帳春嬌  
是處貂裘透暖任尊前回舞紅倦  
柔腰今朝虧陶家茶  
鼎寂寥料得東皇戲劇怕蛾兒  
街柳先鬪元宵宇宙  
低迷倩誰分淺亞深凹休嗟空花  
無據便真箇瓊雕玉

琢總是虛飄且沉醉赴樓頭零片未消

齊天樂

柳花引過橫塘路紫回曲蹊通圃插槿編籬挨梅砌石  
次第海棠成塢吟筇獨拄待尋訪斜橋水邊窺戶已約  
青山雲深不礙客來處繁華閱人無數問舊日平原  
君還知否啼鳥窓幽晝陰人寂慵困不如飛絮匆匆燕  
語似迎得春來且留春住惜取名花一枝堪寄與

詹正

一作玉字可大別號天  
海郢人官翰林學士

霓裳中序第一

至元間監醢長春宮見羽士文室古鏡狀似秋葉背有金刻宣和御

寶四字有感因賦

一規古蟾魄瞥過宣和幾春色知那箇柳鬆花怯曾搓  
玉團香塗雲抹月龍章鳳刻是如何兒女消得便孤了  
翠鸞何限人更在天北磨滅古今離別幸相從薊門  
仙客蕭然林下秋葉對雲淡星疎眉青影白佳人已傾  
國謾贏得癡銅舊畫興亡事道人知否見了也華髮

三姝媚

古衛舟子謂曾載錢唐宮人

一蓬兒別苦是誰家花天月地兒女紫曲藏嬌慣錦窠  
金翠玉璫鐘呂綺席傳宣笑聲裏龍樓三鼓歌扇題詩  
舞袖籠香幾曾塵土因甚留春不住怎知道人間匆  
匆今古金屋銀屏被西風吹換蓼汀蘋渚如此江山應  
悔却西湖歌舞載取斷雲何處江南烟雨

齊天樂

贈童癡天  
兵後歸杭

相逢喚醒京華夢吳塵暗斑吟髮倚擔評花認旗沽酒  
歷歷行歌竒跡吹香弄碧有披柳風情逋梅月色畫鼓

紅船滿湖春水斷橋客  
當時何限俊侶甚花天月地  
人被雲隔却載蒼烟更招白鷺一醉修江又別今回記  
得再折柳穿魚賞花催雪如此湖山忍教人更說

清平樂

醉紅宿翠髻顰烏雲隱  
管是夜來渾不睡那更今朝早  
起東風滿搦腰肢階前小立多時却恨一番新雨想  
應濕透鞋兒

吳澄

字幼清崇安人仕至翰林學士追封臨川郡公謚文正學者稱草廬先生有詞一卷

渡江雲

揭浩齊送  
春和韻

卷二十七

名園花正好嬌紅殢白百態競春妝笑痕添酒暈豐臉  
凝脂誰與試鉛霜詩朋酒伴起此日流轉風光儘夜遊  
不妨秉燭未覺是疎狂 茫茫一年一度爛熳離披似  
長江去浪但要教啼鶯語燕不怨盧郎問春春道何曾  
去任蜂蜨飛過東牆君看取年年潘令河陽

彭元遜

字與吾  
廬陵人

漢宮春

元夕

十日春風又一番調弄怕暖愁陰夜來風雨搖得楊柳  
黃深薰篝未斷夢舊寒殘醉同衾便是聞燈見月看花  
對酒驚心攜手滿身花影香霏冉冉露濕羅襟笙歌  
行人歸去回首沉沉人間此夜誤春光一刻千金明日  
問紅巾青鳥蒼苔自拾遺簪

玉女迎春慢

柳

繞入新年逢人日拂拂淡烟無雨葉底妖禽自語小啄  
幽香還吐東風辛苦便怕有踏青人誤清明寒食消得



渡江黃翠千縷 看臨小帖宜春填輕暈濕碧花生霧  
為說釵頭裊裊繫著輕盈不住問郎留否似昨夜教成  
鸚鵡走馬章臺憶得畫眉歸去

子夜歌

和劉尚友韻

視春衫篋中半在浥浥酒痕花露恨桃李隨風吹盡夢  
裏故人如霧臨穎美人秦川公子却共何人語對誰家  
花草池臺回首故園咫尺未成歸去 昨宵聽危絃急  
管酒醒不知何處漂泊情多衰遲感易無限堪憐許似

尊前眼底紅顏消幾寒暑年少風流未諳春事追與東  
風賦待他年君老巴山共君聽雨

解珮環

江空不渡恨蘼蕪杜若零落無數遠道荒寒婉婉流年  
望望美人遲暮風烟雨雪陰晴晚更何須春風千樹盡  
孤城落木蕭蕭日夜江聲流去日宴山深聞笛恐他  
年流落與子同賦事濶心違交淡媒勞蔓草沾衣多露  
汀洲窈窕餘醒寐遺珮浮沉澧浦有白鷗淡月微波寄

語逍遙容與

羅志仁

號壺秋  
涂川人

霓裳中序第一

四聖  
觀

來鴻又去燕看罷江潮收畫扇謾湖曲雕欄倦倚正船  
過西陵快篙如箭凌波不見但陌花遺曲淒怨孤山路  
晚蒲病柳淡綠銷深院離恨五雲宮殿記舊日曾遊  
翠輦青紅如寫便面帳下鵲池荒放鶴人遠粉牆隨岸  
轉漏壁瓦殘陽一線蓬萊夢人間那信坐看海濤淺

風流子

泛湖

歌咽翠眉低湖船客尊酒謾重携正斷續齊鐘高峯南  
北飄零野褐太乙東西淒涼處翠連松九里胡馬濺障  
泥葛嶺樓臺夢隨烟散吳山宮闕恨與雲齊靈峯飛  
來又飛不去有落日斷猿啼無限風荷廢港露柳荒畦  
歎岳公英骨麒麟舊塚坡仙吟魄鶯燕長堤欲弔梅花  
無句素壁慵題

金人捧露盤

錢唐懷古

濕苔青妖血碧壞垣紅怕精靈來往相逢荒烟瓦礫寶  
釵零亂隱鸞龍吳峯越巘翠顰銷若為誰容浮屠換  
朝陽殿僧磬改景陽鐘興亡事淚老金銅驪山廢盡更  
無宮女說玄宗海濤落月角聲起滿眼秋風

虞美人

淨慈  
尼

君王曾惜如花面往事多恩怨霓裳和淚換袈裟又送  
鸞輿北去聽琵琶當年未削青螺髻知是歸期未天  
花交室萬緣空結綺臨春何處淚痕中

韋居安

號梅澗

摸魚兒

繞茗城水平波渺雙湖遙睇無際就中惟有漁灣好占  
得西關佳致楊柳外羨汎宅浮家當日玄真子溪山信  
美歎陳迹猶存前賢已往誰會景中意蕭閒甚築屋  
三間近水汀洲香汎蘭芷清風明月知多少肯滯軟紅  
塵裏垂釣餌趁春水生時賸有桃花鰕煩襟淨洗待辦  
取輕蓑來分半席相對弄清泚

詞綜卷二十七